

## OWEN, ELIAS (1833 - 1899), clerigwr a hynafiaethydd

**Enw:** Elias Owen  
**Dyddiad geni:** 1833  
**Dyddiad marw:** 1899  
**Priod:** Margaret Owen (née Pierce)  
**Rhiant:** James Owen  
**Rhyw:** Gwryw  
**Galwedigaeth:** clerigwr a hynafiaethydd  
**Maes gweithgaredd:** Crefydd; Hanes a Diwylliant  
**Awdur:** Ellis Davies

Ganwyd yn 1833, mab i James Owen, amaethwr ym mhlwyf Llandysilio, Sir Drefaldwyn, a ymsefydlodd wedyn yn Llanidloes. Ar ôl cwrs mewn coleg hyfforddiadol, penodwyd Elias Owen yn brifathro Ysgol Genedlaethol Llanllechid. Yma dechreuodd ymddiddori mewn hynafiaethau. Trodd ei sylw at hen olion y plwyf, a chyhoeddodd ffrwyth ei ymchwiliadau yn y *North Wales Chronicle* a'r *Archæologia Cambrensis* dan y pennawd 'Arvona Antiqua,' 1866, 1867 (gyda map), 1872. Priododd, yn Llanllechid, â Margaret Pierce. Yn 1871 enillodd radd B.A. yng Ngholeg y Drindod, Dilyn (M.A. 1878). Ordeiniwyd ef yn ddiagon yn 1871 (offeiriad 1872) gan esgob Bangor, a daeth yn gurad Llanwnnog, Sir Drefaldwyn, hyd 1875, pan symudodd i eglwys y Lân Drindod, Croesoswallt. Y flwyddyn ddilynol penodwyd ef yn arholwr gwybodaeth ysgrythurol yn ysgolion eglwysig esgobaeth Llanelwy, swydd a ddaliodd hyd 1881 pryd y derbyniodd fywoliaeth Efenechtyd ger Rhuthyn. Yn 1892 symudodd i Lanyblodwel lle'r arhosodd hyd ei farwolaeth, 19 Mai 1899, yn 65 oed. Parhaodd yn ddiwyd i astudio hynafiaethau, ac etholwyd ef yn F.S.A. Ysgrifennodd yn helaeth, a chyfrannodd erthyglau i'r *Archæologia Cambrensis*, yr *Antiquary*, y *Reliquary*, y *Montgomery Collections*, etc. Ei brif waith llenyddol oedd *The Old Stone Crosses of the Vale of Clwyd*, 1886. Llyfr arall oedd *Welsh Folk-Lore*, 1896, traethawd arobryn yn eisteddfod genedlaethol Llundain, 1887. Golygodd hefyd, 1895, weithiau *Griffith Edwards* ('Gutyn Padarn'). Yn ei flynyddoedd olaf casglodd ddefnyddiau, sydd yn awr yn y Llyfrgell Genedlaethol, gogyfer â chyfrol ar ffynhonnau cysegredig Gogledd Cymru.

### Awdur

Y Canon Ellis Davies, (1872 - 1962)

### Ffynonellau

*Bye-Gones, relating to Wales and the Border Counties*, 24 Mai 1899

*Archæologia Cambrensis*, 1901, 322

T. R. Roberts, *Eminent Welshmen: a short biographical dictionary of Welshmen... from the earliest times to the present* (1908)

*Collections Historical and Archaeological relating to Montgomeryshire*, xxxi, 201

### Darllen Pellach

Erthygl Wicipedia: [Elias Owen](#)

### Dolenni Ychwanegol

Wikidata: [Q5360573](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

